



叔公

我上欣羨叔伯的兄弟姊妹，個有一個上讚的阿公。叔公真有囡仔量，阮規陣猴囡仔定定共伊圍佇中央，伊那啲茶那講古，閣不時挲阮的頭，共阮呵咾兩句仔。阮阿公就無遮好性地，我見若看著阿公的歹面腔，就緊閃甲遠遠。

阿母逐擺若拄著無了解的道理，就會去請教叔公。有一冬，厝裡的狗母生一隻孤囡，有人講孤狗歹吉兆，愛緊掠去捫掉。阿母真毋甘，想欲留閣驚出代誌，就走去問叔公。叔公講：「孤狗顧後門，孤貓顧粟倉。」阿母才無閣為著敢欲留彼隻孤狗，心肝頭袂定著。我捌問講：「是按怎豬來窮，狗來富？古早時代豬有價值，會當賣錢，上無嘛有豬肉通食。啊狗仔來毋是加食了米的，是按怎有這句俗語咧？」叔公就講一個故事予我聽。以早有一個庄跤人，飼一牢豬仔。有一工一隻生份豬走來，閣不止仔大隻，伊就歡喜想講真好空，加一隻豬通賣，暗時就做伙關入去豬牢。無疑悟，這隻外來的豬，半暝搥破豬牢，規牢豬仔走甲無半隻。故事聽完，我就了解其中的緣故，有影是「老人毋講古，少年毋捌寶」。

叔公對我講：「咱規家族對彰化溪湖搬徙來臺東，恁阿公是大囡，好歹攏著愛承擔真大的責任，所以攏著愛激面腔，別人才毋敢聳鬚。其實伊真好鬥陣，恁遮做孫的人著愛較會曉司奶咧。」雖然叔公按呢交代，毋過我嘛是毋敢去揣阿公開講。一直到嫁翁生囡，想著叔公的話，我才定定恁囡仔去阿公的菜園仔。拄著有一年歇熱，文化局連續辦六場歌仔戲團的演出。阿公看甲熱怱怱，逐擺攏坐佇上頭前，橐袋仔閣紮糖仔予乾仔孫食。上尾一齣拄著風颭，風透甲戲棚 kinnh-kuàinnh 叫，雨愈落愈大，我想欲摸阿公來去轉，伊毋走，一直看甲煞才甘願。我想阿公一直真孤單，十外個孫，竟然無人恰伊會親，好佳哉有叔公的提醒恰囡仔的純真，我才有機會通重新熟似阿公。

作者：後山人

☆詞彙學習☆

【呵咾】o-ló：讚美、表揚。

【捫掉】hinn-tiāu：扔掉。

【無疑悟】bô-gî-ngōo：又唸作 bô-gî-gōo。
不料、想不到。

【激面腔】kik-bīn-tshiunn：擺個不好的、難看的臉色。

【聳鬚】tshàng-tshiu：引申為囂張、逞威風。

【司奶】sai-nai：撒嬌。恁意做出嬌態以博得對方的寵愛。

【乾仔孫】kan-á-sun：曾孫。稱謂。指稱兒子的孫子。